

im rechten iber alles daz er in bechlagt hat und sol in in di echt tuen iz ensei denne umb gult. do sol man nieman umb echten. der richter sol sein gewon(1)ich puezz nemen. und chumt er fuer der do nicht antwurten wolt und wil er auz der echt chomen und ist ener gezeugen nicht da der in da ze echt hat gefrumet der richter mag in mit recht nimmer auz der echt lan als umb ein ander schulde daz chumt von der grozzen freuel di er begie do er vor gericht vaz<sup>a</sup> und nicht antwurten wolt und vor der grozzen versmach di er an dem gericht getan hat. und chomen si paid fur den richter und pittet ener daz man in auz der echt lazze. ist auch daz er purgel setzet als recht ist. man sol in auz der echt lazzen und er sol dem chlager ze hant recht gepieten. und geprist er dem chlager er ist doch dem richter des echtes panes schuldich. daz ist allez do er vor gericht waz und er nicht antwurten wolde. wil er aber laugen daz er do nicht wer des sol er in uberzeugen selb drit di in da sachen.

LXXX. Wie man auz der echt chomen sol.

108] Wer sich auz der echt wil ziechen der sol sich ungepunden und und unbetwagen und an purgelschaft fur chomen und sol den richter ze burgel setzen umb des chlagers recht und umb sein selbes recht und sol er in denne auz der echt lan. und er sol den frid sweren ob ein vrid gewert ist. und ist chain vrit geswarn er sol den gotes frid swern. daz ist dar umb gesetzt do man in in di echt tet do nam man in auz fride und chunt in in di echte. und ist daz auf einem lantgericht der richter sol den manne gepieten daz er chome zu drin lanttai(d)ingen ob ieman auf in welle chlagen daz er dem antwurte. und chumt er zu den drin taidingen und sprichet in nieman an er ist ledich vor allen den di in in di echt taten iz ensei denne daz si eehaft not ierre

---

107] lies was Rj.